

29/11/1999

Osman nafi arah ahli Umno undi calon Pas

ALOR STAR, Ahad - Bekas Menteri Besar Kedah, Tan Sri Osman Aroff, menafikan beliau menerusi seorang saudara maranya mengarahkan ahli Umno di Parlimen Kubang Pasu mengundi calon Pas.

Osman yang juga Pengarah Pilihanraya Barisan Nasional (BN) Kubang Pasu berkata beliau tidak pernah mengarahkan sesiapa, termasuk seorang saudaranya memberitahu ahli Umno dan pengundi supaya memilih calon Pas pada hari pengundian, esok.

"Ini adalah pembohongan besar oleh pihak tidak bertanggungjawab dan saya nafi sekeras-kerasnya. Takkan saya yang sudah begitu lama menjadi ahli Umno dan menjawat jawatan tinggi dalam kerajaan sanggup berbuat begitu. Itu satu kerja bodoh," katanya ketika dihubungi hari ini.

Osman yang juga Timbalan Ketua Umno bahagian menyifatkan pihak terbabit ketandusan modal untuk meraih undi pada saat akhir dengan menyebarkan khabar angin.

Saudaranya itu dikatakan berceramah atas pentas Pas sejak semalam dengan mendakwa Osman dan Ketua Penerangan Umno bahagian, Datuk Shuib Endut mengarahkannya memberitahu pengundi supaya memilih calon Pas.

Osman yang juga wakil peribadi Perdana Menteri Menteri Datuk Seri Dr Mahathir Mohamad di Parlimen Kubang Pasu, berkata beliau tidak pernah berjumpa dengan saudaranya itu sejak hari penamaan calon.

(END)